

Pelaburan, kerjasama dua hala fokus Anwar dengan pemimpin lain

Oleh **JUANI MUNIR ABU BAKAR**
juani.bakar@mediamulia.com.my

PETALING JAYA: Soal pelaburan dan kerjasama dua hala merupakan antara perkara disentuh dalam pertemuan Perdana Menteri, Datuk Seri Anwar Ibrahim bersama empat pemimpin ASEAN bersempena Sidang Kemuncak ASEAN ke-42 di Labuan Bajo, Indonesia.

Empat pemimpin ASEAN tersebut ialah Sultan Brunei, Sultan Hassanal Bolkhiah; Perdana Menteri Vietnam, Pham Minh Chinh; Perdana Menteri Laos, Sonexay Siphandone dan Perdana Menteri Timor Leste, Taur Matan Ruak.

Menurut Anwar, sewaktu kunjungan hormat ke atas Sultan Brunei, beliau menyampaikan hasrat Putrajaya selaku tuan rumah untuk melihat kehadiran dan keterlibatan Bandar Seri Begawan dalam Annual Leaders' Consultation (ALC) tahun ini.

"Selain itu, diskusi juga terarah kepada bidang pelaburan, penandaan tanah, kerjasama dalam kebudayaan dan pendidikan untuk dimanfaatkan kedua-dua negara," katanya dalam Facebook beliau.



PEMIMPIN ASEAN menghadiri sesi pemukiman sempena Sidang Kemuncak ASEAN 2023 di Labuan Bajo, Indonesia, semalam. - PEJABAT PERDANA MENTERI

Dalam pada itu, Perdana Menteri memaklumkan, ketika pertemuan bilateral dengan Perdana Menteri Vietnam, Anwar sampaikan keterbukaan Malaysia menerima kehadiran delegasi mereka ke Putrajaya sempena ulang tahun ke-50 kedua-dua negara.

"Diskusi juga menyentuh bidang pelaburan selain berharap agar isu pencerobohan nelayan di perairan Malaysia dapat ditangani setegasnya," kata beliau.

Selain itu, Anwar sempat mengadakan pertemuan dua hala

dengan Sonexay Siphandone dan mereka sepakat untuk lebih bekerjasama dalam bidang perbankan, program latihan pegawai dan diplomat selain pendidikan serta industri agrikultur.

"Arakian, saya juga mengadakan pertemuan bilateral dengan

rakan sejawat dari Timor Leste, Taur Matan Ruak dan saya mengulangi sokongan penuh berkaitan permohonan republik itu dalam keanggotaan keluarga ASEAN.

"Malah, diskusi juga membincangkan keperluan meningkatkan peluang kerjasama dalam pelaburan, perdagangan, agrikultur dan bidang pembuatan makanan yang menuntun kebersamaan serta komitmen berterusan kedua-dua negara," katanya.

Sementara itu, Anwar ketika berucap pada Majlis Perjumpaan Pemimpin ASEAN bersama Perwakilan Belia ASEAN menegaskan ASEAN tidak boleh membiarkan isu peminggiran dan kemiskinan terus diketepikan, sebaliknya ia perlu diberi tumpuan agar masalah itu dapat diselesaikan.

Jelasnya, sebarang transformasi di rantau tersebut perlu bersifat inklusif dan tidak mengetepikan mana-mana pihak.

Beliau turut memuji komitmen yang ditunjukkan pemimpin belia ASEAN dalam menentang isu tersebut yang seharusnya mendapat perhatian semua pihak.